

لمسة حنان من ريش جناحها

حدود ممالكك دنيتي...!!

باستلطفك..  
علشان عيونك كهرمان الروح  
وحدود ممالكك دنيتي..  
عصافير وخضرا وجنة مليانه بظلال  
ونسيم يهفهف ع الورق تغاريد..  
كلمات قسايدك سحرت الوجدان..  
سبقتني سكنت ف الوريد  
وعششت بين الغصون موال  
عرفت طريقها ومرجحت منى الشعور  
وخذتني من نفسي لعالم كله سحر وأخيله  
ولقتني ف أحضان النجوم..  
بشاور على القمر اللي سهران ف الجزيرة هناك  
ومضوى ليلي بلؤلؤ اللحظة..  
أنا قولتلك ده الحب..  
بس تفسيره بيعجز ع الوجود  
فيه حبل سري بيربطك بيا  
ما اقدرش أبعد أو أبوح بالسر..  
وكأني طفله بصفيرة ملونة  
مفتونه بالزقزقات  
ما اعرفش أبعد عن مدارك..

وكأني مشدوده بحنين وآهات  
طيب.. ممكن تفسر لي ارتباطى بطناك  
اللى خطفانى ببريق وحنان  
واللى حطانى فى طريق باعشق خطاه  
وارسم وجودى فى دنيته..  
ورده بتحلم بالأمان.